

Հաստատված է

ՇՊՀ գիտական խորհրդի

2016թ. դեկտեմբերի 20-ի նիստում

Գիտական խորհրդի նախագահ՝ _____ Ս. Գ. Մինասյան

ԿԱՆՈՆԱԿԱՐԳ

**ՇԻՐԱԿԻ Մ. ՆԱԼԲԱՆԴՅԱՆԻ ԱՆՎԱՆ ՊԵՏԱԿԱՆ ՀԱՄԱԼՍԱՐԱՆ ՀԻՄՆԱԴՐԱՄԻ
«ԼԱՎԱԳՈՒՅՆ ՈՒՍԱՆՈՂ» ԱՄԵՆԱՄՅԱ ՄՐՑԱՆԱԿԱԲԱՇԽՈՒԹՅԱՆ
ԿԱԶՄԱԿԵՐՊՄԱՆ ԵՎ ԱՆՑԿԱՑՄԱՆ**

1. ԸՆԴՀԱՆՈՒՐ ԴՐՈՒՅԹՆԵՐ

1.1. Սույն կանոնակարգով սահմանվում է «Շիրակի Մ. Նալբանդյանի անվան պետական համալսարան» հիմնադրամի «Լավագույն ուսանող» ամենամյա մրցանակաբաշխության (այսուհետ՝ մրցանակաբաշխություն) կազմակերպման և անցկացման կարգը:

1.2. Մրցանակաբաշխությունը կազմակերպվում և անցկացվում է տարին մեկ անգամ: Նպատակն է խրախուսել Շիրակի պետական համալսարանի բակալավրիատում և մագիստրատուրայում սովորող ուսանողների առաջադիմությունը և խթանել նրանց գիտական և հասարակական ակտիվությունը: Մրցույթին կարող են մասնակցել ՇՊՀ բոլոր ֆակուլտետների ուսանողները:

1.3. Մրցանակաբաշխությունն անցկացվում է ուսումնական տարվա առաջին կիսամյակում:

1.4. Սույն կանոնակարգը հաստատվում, դրանում փոփոխություններ և լրացումներ են կատարվում ՇՊՀ գիտական խորհրդի որոշմամբ:

2. ՄՐՑԱՆԱԿԱԲԱՇԽՈՒԹՅԱՆ ՀԱՆՁՆԱԺՈՂՈՎԻ ԿԱԶՄԸ ԵՎ ԳՈՐԾՈՒՆԵՈՒԹՅԱՆ ԿԱՐԳԸ

2.1. Մրցանակաբաշխությունը կազմակերպում և անցկացնում է «Շիրակի պետական համալսարանի լավագույն ուսանող» ամենամյա մրցանակաբաշխության հանձնաժողովը (այսուհետ՝ Հանձնաժողով), որը բաղկացած է 7 հիմնական անդամից՝ ՇՊՀ ռեկտորը, պրոռեկտոր-ուսումնամեթոդական գործընթացի կառավարման և գործատուների հետ համագործակցության կենտրոնի տնօրենը, պրոռեկտոր-գիտական քաղաքականության և արտաքին համագործակցության կառավարման կենտրոնի տնօրենը, Ուսանողների աջակցության բաժնի վարիչը, Գիտական քարտուղարը, Ուսանողական խորհրդի նախագահը, Ուսանողական գիտական ընկերության նախագահը: Հանձնաժողովի կազմում յուրաքանչյուր ֆակուլտետի դեպքում ընդգրկվում են տվյալ ֆակուլտետի դեկանը և ուսանողական խորհրդի նախագահը:

2.2. Հանձնաժողովը նախագահում է ՇՊՀ ռեկտորը:

2.3. Հանձնաժողովը սահմանում է իր գործունեության աշխատակարգը: Հանձնաժողովի քարտուղարը գիտական քարտուղարն է:

2.4. Թեկնածուների առաջադրման, հաղթողների ընտրության, մրցանակաբաշխության անցկացման (մրցանակների հանձնման հանդիսավոր արարողության) և այլ աշխատանքների կազմակերպման համար Հանձնաժողովը հրավիրում է նիստեր և աշխատանքային խորհրդակցություններ:

2.5. Հանձնաժողովի նիստն իրավագոր է, եթե դրան մասնակցում է անդամների կեսից ավելին: Հանձնաժողովի որոշումներն ընդունվում են ներկաների ձայների առնվազն 2/3-ով: Մրցանակաբաշխության հաղթողների վերաբերյալ Հանձնաժողովի որոշումները մինչև մրցանակաբաշխության անցկացման օրը հրապարակման ենթակա չեն:

3. ՄՐՑԱՆԱԿԱԲԱՇԽՈՒԹՅԱՆ ԹԵԿՆԱԾՈՒՆԵՐԻ ԱՌԱՋԱԴՐՄԱՆ ԿԱՐԳԸ

3.1. Մրցանակաբաշխությանը կարող են մասնակցել կամ որպես թեկնածու առաջադրվել այն ուսանողները, ովքեր առնվազն 4 կիսամյակ հանդիսացել են Շիրակի պետական համալսարանի ուսանող, վերջին երկու կիսամյակների ընթացքում ունեցել են բարձր կամ գերազանց առաջադիմություն (ՄՈԳ-ը՝ 81 և բարձր), ինչպես նաև ունեն սույն կանոնակարգի 3.4 կետում նշված ձեռքբերումները: Մրցանակաբաշխությանը մասնակցելու (որպես թեկնածու առաջադրվելու) համար ուսանողը, սահմանված կարգի համաձայն, պետք է ներկայացնի համապատասխան հայտ և անհրաժեշտ կից փաստաթղթերը:

3.2. Մրցանակաբաշխության անցկացման օրվանից առնվազն 30 օր առաջ Հանձնաժողովը հայտարարում է մրցանակաբաշխության անցկացման պայմանների և թեկնածուների առաջադրման մասին: Թեկնածուների առաջադրումն իրականացվում է համապատասխան հայտերի միջոցով (հավելված 1)՝ թղթային կամ էլեկտրոնային (առցանց) ձևաչափով: Հայտերի ներկայացման վերջնաժամկետը, որը պետք է լինի մրցանակաբաշխության անցկացման օրվանից առնվազն 10 օր առաջ, սահմանում է Հանձնաժողովը:

3.3. Մրցանակաբաշխությանը մասնակից ուսանողների հայտերը և կից փաստաթղթերը ներկայացվում են ՇՊՀ Ուսանողական խորհուրդ: Էլեկտրոնային (առցանց) հայտերի ներկայացման ձևաչափ սահմանելու դեպքում՝ փաստաթղթերը ներկայացվում են համապատասխան առցանց գործիքի միջոցով: Էլեկտրոնային (առցանց) հայտերի ներկայացման մասին որոշումն ընդունվում է Հանձնաժողովի կողմից մրցանակաբաշխության անցկացման պայմանների հայտարարության ժամանակ:

3.4. «ՇՊՀ լավագույն ուսանող» մրցանակակիր որոշելու համար դիտարկվում են ուսանողի հետևյալ ձեռքբերումները.

ա/ առաջադիմություն,

բ/ ներգրավվածություն գիտական աշխատանքներում, **մասնակցություն նրամաշնորհերին:**

գ/ մասնակցություն ներհամալսարանական արտալսարանային կյանքին,

դ/ արտահամալսարանական (հասարակական) ակտիվություն

ե/ մշակույթի, սպորտի, արվեստի և այլ ոլորտներում հաջողություններ:

3.5. Մրցանակաբաշխության մասնակցի հայտին կից կարող են ներկայացվել հետևյալ փաստաթղթերը.

ա/ 1 բնութագիր ֆակուլտետի դեկանի և 1 բնութագիր մասնագիտական ամբիոնի վարիչի կողմից,

բ/ ուսանողական խորհրդի և (կամ) ուսանողական գիտական ընկերության նախագահի բնութագիրը,

գ/ տպագրված գիտական աշխատանքների պատճենները, գիտաժողովներին մասնակցության վկայականները կամ դրանք հավաստող այլ փաստաթղթեր (եթե այդպիսիք կան),

դ/ այլ փաստաթղթեր և նյութեր (տեքստային, պատկերային, զուգակցված և այլն), որոնք լավագույնս կներկայացնեն մրցանակաբաշխությանը մասնակից ուսանողի՝ սույն կանոնակարգի 3.4. կետում նշված ձեռքբերումները:

Առաջադիմության վերաբերյալ տեղեկատվությունը Հանձնաժողովին կտրամադրվի ՇՊՀ համապատասխան կառուցվածքային ստորաբաժանումների կողմից:

3.6. Մրցանակաբաշխության հայտերի ընդունման վերջնաժամկետը լրանալուց հետո՝ երկօրյա ժամկետում, ՇՊՀ կայքում հրապարակվում է հայտ ներկայացրած ուսանողների ցանկը: Եթե որևէ ֆակուլտետից (կենտրոնից) սահմանված ժամկետում ստացվել է սույն կանոնակարգի 3.1. կետի պահանջներին համապատասխանող երեք կամ ավելի քիչ թվով հայտ, ֆակուլտետի դեկանը հայտերի ներկայացման վերջնաժամկետից հետո՝ երեք օրվա ընթացքում, կարող է առաջադրել լրացուցիչ թեկնածուներ:

4. ՄՐՑԱՆԱԿԱԲԱՇԽՈՒԹՅԱՆ ՀԱՂԹՈՂՆԵՐԻ ԸՆՏՐՈՒԹՅԱՆ ԸՆԹԱՑԱԿԱՐԳԸ

4.1. Մրցանակաբաշխության հաղթողի ընտրությունն իրականացվում է մրցութային կարգով, երկու փուլով՝ ներկայացված հայտերի գնահատում և հարցազրույց, որոնց արդյունքում ձևավորվում է մրցութին մասնակից ուսանողի ընդհանուր միավորը:

4.2. Առաջին փուլում Հանձնաժողովը (հիմնական կազմով) դիտարկում է հայտ ներկայացրած ուսանողների համապատասխանությունը մրցանակաբաշխության ձևայնացված պահանջներին և ըստ սույն կանոնակարգի սահմանված չափանիշների՝ կատարում հայտերի գնահատում:

4.3. Հայտի և կից ներկայացված փաստաթղթերի բալային գնահատման ժամանակ Հանձնաժողովն առաջնորդվում է սույն կարգի 4.4, 4.5, 4.6, 4.7 և 4.8 կետերում նշված չափանիշներով:

4.4. Առաջադիմության համար տրվող միավորներ. թեկնածուների ուսման առաջադիմությունը առավելագույնը գնահատվում է 20 միավորով: Միավորը հաշվարկվում է հետևյալ սանդղակի համաձայն՝

96-100 ՄՈԳ - 20 միավոր

91-96 ՄՈԳ - 19 միավոր

86-91 ՄՈԳ - 18 միավոր

81-86 ՄՈԳ - 17 միավոր

Մագիստրատուրայի ուսանող-թեկնածուների դեպքում ուսման առաջադիմությունը հաշվարկվում է բակալավրիատի ՄՈԳ-ի և ընթացիկ ՄՈԳ-ի միջին թվաբանականով:

4.5. Ներգրավվածությունը գիտական աշխատանքներում. թեկնածուների՝ գիտական աշխատանքներում ներգրավվածության գնահատականը ձևավորվում է ստորև նշված 4.5.1, 4.5.2, 4.5.3, 4.5.4. և 4.5.5. կետերով՝ թեկնածուին հասանելի միավորների հանրագումարով (հանրագումարային միավորը սահմանափակվում է 15 միավորով): Վերը նշված կետերով սահմանված չափանիշների համաձայն՝ մրցույթի հաղթողը պետք է ապահովի գիտական աշխատանքների ներգրավվածության նվազագույն շեմը՝ 2 միավոր:

4.5.1. Զեկուցմամբ մասնակցություն գիտաժողովներին, սեմինարներին, կոնֆերանսներին, համաժողովներին և գիտական ուղղվածություն ունեցող այլ միջոցառումներին. մեկ զեկուցման համար՝ 1 միավոր, երկու և ավելի զեկուցումների համար՝ 2 միավոր:

4.5.2. Տպագրված թեզիսներ. մեկ տպագրված թեզիսի համար տրվում է 1 միավոր, երկու և ավելի թեզիսների համար՝ 2 միավոր:

4.5.3. Արտերկրի հեղինակավոր (որոշվում է Հանձնաժողովի կողմից) ամսագրերում մեկ տպագրված հոդվածի համար տրվում է 6 միավոր, երկու և ավելի հոդվածների համար՝ 12 միավոր:

4.5.4. Հեղինակավոր մրցանակի կամ միջազգային օլիմպիադայի դիպլոմին արժանանալու դեպքում տրվում է 2 միավոր (յուրաքանչյուրի համար), սակայն առավելագույնը՝ 4 միավոր:

4.6 Մասնակցություն ներհամալսարանական կյանքին. թեկնածուների ներհամալսարանական կյանքին մասնակցության գնահատականը ձևավորվում է ստորև նշված 4.6.1, 4.6.2, 4.6.3 և 4.6.4 կետերով՝ թեկնածուին հասանելի միավորների հանրագումարով (հանրագումարային միավորը սահմանափակվում է 20 միավորով):

Մրցույթի հաղթողը պետք է ապահովի ներհամալսարանական հասարակական աշխատանքների ներգրավվածության նվազագույն շեմը՝ 5 միավոր:

4.6.1. Ֆակուլտետի ուսանողական հասարակական (արտալսարանային) տարբեր միջոցառումներում ակտիվ մասնակցության, ներգրավվածության և կազմակերպման համար (մասնակցություն տարբեր միջոցառումներին, բացառությամբ այն միջոցառումների, որոնք դիտարկվել են 4.5.1. կետում) թեկնածուին տրվում է 2-ից 4 միավոր:

4.6.2. ՈՒԽ կամ ՈՒԳԸ անդամներին, ֆակուլտետի խորհրդի անդամներին տրվում է 3 միավոր:

4.6.3. Համահամալսարանական ուսանողական հասարակական աշխատանքներում ակտիվ ներգրավվածության համար տրվում է 5-ից 8 միավոր:

4.6.4. Մշակույթի, սպորտի, արվեստի և այլ ոլորտներում նշանակալի հաջողությունների համար Հանձնաժողովի որոշմամբ կարող է տրվել մինչև 5 միավոր:

4.7. Առաջին փուլի արդյունքում յուրաքանչյուր ֆակուլտետից ընտրվում են մրցանակաբաշխության հաղթողի երեք հավակնորդներ: Հիմնական հավակնորդների անունները հրապարակվում են ՇՊՀ կայքում մրցանակաբաշխության անցկացման օրվանից (մրցանակների հանձնման հանդիսավոր արարողությունից) առնվազն երեք օր առաջ: Հիմնական հավակնորդները հրավիրվում են մասնակցելու մրցանակների

հանձնման հանդիսավոր արարողությանը. մրցանակաբաշխության հաղթող չճանաչված հիմնական հավակնորդները պարզևատրվում են պատվոգրով: ՇՊՀ ռեկտորատն ու ՇՊՀ ուսանողական խորհուրդը կարող են սահմանել նաև մրցույթի հիմնական հավակնորդների խրախուսման այլ միջոցներ:

4.8. Հաղթողի ընտրության փուլում յուրաքանչյուր ֆակուլտետից մրցանակաբաշխության հաղթողի երեք հավակնորդները հրավիրվում են Հանձնաժողովի (հիմնական կազմ և տվյալ ֆակուլտետի դեկան և ՈՒԽ նախագահ) կողմից իրականացվող հարցազրույցի, որի ընթացքում ներկայացնում են **5 րոպե տևողությամբ «Իմ հաջողության պատմությունը» վերտառությամբ ինքնաներկայացումը: Հայտին կցված փաստաթղթերը դիտարկվում են հարցազրույցի ընթացքում:** Հարցազրույցի արդյունքում Հանձնաժողովի կողմից յուրաքանչյուր հավակնորդին տրվում է 0-5 միավոր: Հաղթողի անունը հրապարակվում է մրցանակների հանձնման հանդիսավոր արարողության ընթացքում:

4.9. Հաղթողը պարզևատրվում է «Շիրակի Մ. Նալբանդյանի անվան պետական համալսարան» հիմնադրամի «Լավագույն ուսանող» ամենամյա մրցանակաբաշխությանը հաղթելու պատվոգրով և մրցանակաբաշխության համար ռեկտորատի կողմից սահմանված մեդալով: ՇՊՀ ռեկտորատն ու ՇՊՀ ուսանողական խորհուրդը կարող են սահմանել նաև մրցույթի հաղթողների խրախուսման այլ միջոցներ (**նաև դրամական**):

4.10. Մրցույթի հաղթող ճանաչված ուսանողը հաջորդ տարի իրավունք չունի մասնակցելու մրցույթին:

5. ՀԱՆՁՆԱԺՈՂՈՎԻ ԸՆԴՈՒՆԱԾ ՈՐՈՇՈՒՄՆԵՐԻ ԲՈՂՈՔԱՐԿՄԱՆ ԿԱՐԳԸ ԵՎ ԺԱՄԿԵՏՆԵՐԸ

5.1. Հանձնաժողովի կողմից ընդունված որոշումները կարող են բողոքարկվել՝ գրավոր դիմում ներկայացնելով ՇՊՀ ռեկտորին, «Լավագույն ուսանող» մրցանակաբաշխության արդյունքների հրապարակման օրվանից հետո՝ մեկօրյա ժամկետում: Հանձնաժողովի կողմից որոշումների ընդունման կամ «Լավագույն ուսանող» մրցանակաբաշխության կազմակերպման և անցկացման գործընթացում ՀՀ օրենսդրության կամ ՇՊՀ ներքին իրավական ակտերի, այդ թվում՝ սույն կանոնակարգի խախտումներ ի հայտ գալու դեպքում ՇՊՀ ռեկտորի պատճառաբանված որոշմամբ կատարվում է մրցանակաբաշխության արդյունքների վերանայում:

Հ Ա Յ Տ

«ՇԻՐԱԿԻ Մ. ՆԱԼԲԱՆԴՅԱՆԻ ԱՆՎԱՆ ՊԵՏԱԿԱՆ ՀԱՄԱԼՍԱՐԱՆ»

ՀԻՄՆԱԴՐԱՄԻ «ԼԱՎԱԳՈՒՅՆ ՈՒՍԱՆՈՂ»ՄՐՑՈՒՅԹԻ

ՄԱՍՆԱԿՑՈՒԹՅԱՆ

Ֆակուլտետը, կուրսը	
Մասնակցի անունը, ազգանունը, հայրանունը	
Ծննդյան ամսաթիվը, տարեթիվը	
Կոնտակտային հեռախոսը	
Կցվող փաստաթղթերի ցանկը	<ol style="list-style-type: none"> 1. 2. 3. . . . N